

Kerwerede 2015

Vorgetragen von Jonas Wipplinger

Erstellt von Nino Piazza

Willkumme ehr Leit,  
es iss mol wärrer Kerwe heit,  
zum zweiten Male on dieser Stelle,  
griß ich Jung, Old unn Junggeselle,  
Jungfraue, Kinner, aus Stadt unn Loond,  
Fremme unn aach die bekonnt!  
Ein Prosit uffs Jubiläumsjohr,  
der Kerweumzug machte es eich vor.  
Uff unser Hoamboch stouß ich ou gonz foi,  
denn näjends kann es schenner soi,  
om beschde mit dem Glos fun Hoambecher Woi.

Prost

### **Musik**

Wie jedes Johr stell ich, seid gonz ohr,  
des Dreamteam, also moi Monnschaft vor!  
Es iss mir eine Ehre, eich heit im Jugeljohr vorzustellen,  
als erschdes unser Königin, Celin die erschde,  
aus dem Geschlecht derer fun Ensinger.  
Foi unn toll, sie sieht gut aus,  
doi Red geschdern owend wor super,  
dodruff ein Applaus.

Als Begleiterin, des is klar,  
iss debei – die Beradinis-Anna,  
die iss, ich sogs frei unn dess iss net fies,  
des Gespusi vum Kerweborsch Philipp Lies.

Unn als dritte im Bunde,  
ich verkünd frohe Kunde,  
iss endlich wol werrer vertrete, do is wos los,  
e Mädchen aus de Werthoimer Stroß,  
aach sie is heit sou schee wie nie,  
unser Rettische-Leonie!

Die Herrn der Schöpfung, ein Gedisch,  
häwwe bei uns eh grouß Gewicht!  
De Karin ehrn Grouße, sie richt aus veel Griß,  
iss unsern Kerweborsch Philipp Lies.

Unn wärrer debei, ich mach koa Dinger,  
aach en Applaus on de Jan Wipplinger.  
Mer merkt holt immer noch für wahr,  
wer unsern Goußvadder gewäse war!

### **Königin:**

Wie letschd Johr seid gonz ohr,  
trägt unsern Jonas die Kerweredd vor,  
erschder Kerweborsch im Jubeljahr,  
dess muss sou soi unn des is klar!  
Gewieft, gewitzt mit em gude Schoppe,  
wärd bassiern, moi Kehl iss trocke.  
Unn ich wills aach nett verheelee,  
er sollt eich all die Gorgel eehle.  
Denn ach ich mach mich on moi Glos Woi,  
sehr zum Wohl, sou soll es soi.

Prost

### **Musik**

Meer sinn do, meer sinn jung,  
noch 850 Johr hot Hoamboach noch Schwung!  
Drum kimmt die Kerweredd sogleich,  
mol säie, wer drinn vorkimmt, do unne fun eich!

Musik

Des Jubiläumsjohr hot jo gut ougefange,  
meer wor fun vorneroi net bonge,  
der Neijohrsempfang hot schon sehr gut geklappt,  
der Ortsbeirat der wor uff Zack.  
Nur unser Ortsvorsteherin,  
ich redd koan Kees,  
wor vor dem Kärchrebeginn e bissel nervees!  
Beim Dirigent vun unserm Gesongsverein,  
des wärd immer schenner,  
worn faschd gleich ougezochene große Männer,  
die Renate Netzer hot gemohnt,  
seid gonz ohr,  
aus Russlond wär des en Kosackechor.  
Die hottse ugesproche,  
wu kummt ehr donn her,  
es iss en weite Weg vun Russlond hierher,  
do säigt oner fun denne, des iss koan Witz,

mehr kumme nnett aus Russloand sondern fun Lautern-Weschnitz!  
Meer wollte blouß zum Empfong heit kumme,  
denn do gibt wos heut for umme!

Sou stellt sich die Geschichte oi,  
es Ourewäller muss koan Russ heit soi!  
Äwwer meer sieht bei aller Liebe,  
scheinbar gibst do koa Unnerschiede!  
Prost

Musik

Monchmol iss, ehr liewe Leit,  
aach en Kerweborsch nett defu gefeit,  
dass ihm bassiert, for mich zum Glick,  
aach emol e Missgeschick!  
Sou gings dem Philipp newe meer, ehr kennt en all,  
der wohnt in de Wäschinggass fum Rousetal,  
der wor fleisch un hott sich gebloocht,  
unn owwe im Wold des Holz gemocht!  
Der hott geschwitzt unn wor uff Zack,  
unn hott soi Jack in de Kofferraum gebracht,  
Kofferraum zu, wos eh Ding,  
der Autoschlisseln wor in de Jack im Kofferraum drin,  
doch, un des wor gar nett foi,  
er kam nett mäi ins Auto noi.  
Schnell die Muder ougerufe,  
lieb Karin du muschd de Ersatzschlüssel suche,  
doch des wor. ich soags gonz flach,  
de Ersatzschlüssel wor im Handschuhfach!

Liewer Philipp, du bitte niemols, des sinn koa Bosse,  
sogar den Ersatzschlüssel im Auto losse,  
denn ohne Schlüssel, aach im im Ort,  
kimmschd du mim Auto nemäi fort!

Dodruff muss ich oner trinke,  
un du on alle, die koan Ersatzschlüssel häwwe, herzlich winke,  
sou loss ich meer schmecke denn gude Woi,  
en Ersatzschlüssel geheert nett ions Auto noi

Prost

## Musik

Meer kumme die Trähne, liewe Leit,  
koa Wätschaft in Hoamboch mäi weit unn breit,  
jetzt hott jo pletzlich iwwer Nacht,  
aach des Adriana zugemacht.  
Koa Adriana unn koa Rous,  
wos iss donn blouß in Hoamboch los.  
Meer kennt jo jetzt, es würd mich stören,  
in Kerschhause zur „Post“ einkehren,  
orrer, äwwer des wärd meer zu viel,  
bei de Sießäppel „In die old Miehl“  
Aach Erboch hätte wos zu biete,  
uff de Routhermelshouf kennt meer die Kerb verschiebe.  
Wos hatte meer friher doch Kneipe satt,  
vun Rous unn Rebstock, bis Stroßewart!  
Ich kennt driwwer redde arig viel,  
Erbächer unn Kerscheiser, gäbt uns Asyl.  
Denn meer häwwwe in Hoamboch, ich soags gonz frei,  
blouß noch e Halbdoagsbäckerei!

Wos bringt do die grouß Flenneri,  
meer mache des beschde draus dabei.  
Zum grouße Glick unn des iss foi,  
wächst bei uns en gude Woi.  
Denn will ich schmecke unn verkoschde,  
unn du eich all jetzt schee zuproschde.  
Zum Wohl!

## Musik

Der Monat Februar ging for monche Leit gonz schee uff die Knoche,  
zwaä Leit häwwwe sich – om selwe Doag - de Arm gebroche.  
Des wor en Zufall, dass ich häbs erfahrn,  
denn ich wor mit ne Platzwund in die Ombulonz fum KKH gefahrn!  
Dem Werners-Monfred aus em Unnerdorf hots in Hepprum erwischt!  
Eh tolli Loandung uff Hepprumer Plaschder,  
donn hott er katte, des grouße Laschder,  
unn de Engrafs-Reinhard aus de Erbisgass,  
iss gesterzt, vielleicht wos nass.  
Zu guter letschd, ich bin nett besoffe,  
häwwwe sich die zwaä im KKH uff de Ambulanz mit meer getroffe.  
Glei zwaä Leit, dess on oam Doag,

hoffentlich wärds nett mäiner, des wär e Ploag,  
denn wonn alle Hoabecher häwe ä Handikapp,  
wärs fors Jubiläumsjohr gar nett nett.  
Denn koaner kennt, meer kem des Graue,  
nett emol en Scheesewache baue!

Königin:

Deshalb, basst uff eier Knoche uff,  
denn mache meer im Juli aach oner druff.  
Bleibt heil unn gesund,  
meer brauche nur den Weißwoischwund.  
Drumm hoch des Gloas, mer soll es donke,  
ein sehr „Zum Wohl“ on alle Kronke!

Musik

Jetzt wos aus em Owwerdorf:

Wonn meer Veehzeig transportiert,  
nimmt meer doch gonz uscheniert,  
ee Schees orrer en grouße Wache,  
for Kieh un Sai, des sinn normale Sache,  
doch wos die Russemitsche häwe fabriziert,  
ich soag es hier gonz unscheniert,  
do kam ehrn PKW vorgefahn ehr Leit,  
ich wor groad uff de onnern Stroßeseit,  
ging pletzlich unn des iss koan Bluff,  
vum PKW de Kofferraum uff,  
unn zum Vorschoi wos en Spass,  
hott rausgeguggt eh fetti Gaas.  
Ich häb geheert donn unscheniert,  
die häwwe ehrn Deckbock transportiert.  
Der Deckbock fum Geschlecht der Ziege,  
wor schoinbar noch nett gonz müde,  
unn kam uff jeden Fall,  
du de onnern Gaase in de Gaasestall.  
Ich will nett wisse, wie denoch, bin nett bekoppt,  
der Kofferraum ausgesäie hot,  
do hots bestimmt noch, ich verkünd die Kunde,  
noch 6 Woche grouß gestunke.  
Ich geb hier on eich noch koan grouß Alarm,  
moi Mudder muss jo nett in dem Auto fahn!

## Musik

Noch oans zum Schluss, ich mach es schnell,  
iss de Umbau fun unsrer olde Verwaltungstell.  
Do wärd geschafft unn Wänd gekloppt,  
in de Paus wuhie gehockt!  
Do stäit ach, wos sinn die Bauarbeiter froh,  
fors menschliche Bedürfnis aach eh schenes Dixiklo.  
Doch moncher Hoambecher kam domit net klar,  
for woss des Ding do wärlich war.  
Oner hot sogar, der wor beglückt,  
hot sou Scheckkart schnell gezückt.  
Weil er gemohnt hot, ich sogas gonz krass,  
des wär de Oigong funn de Hepprumer Kreissparkass.  
Der hot gemoht, des iss holt schad,  
dodrin wär en Geldautomat!  
Die Erkenntnis stellt sich oi,  
en AB muss koan Geldautomat soi!

Ja ehr Leit, sou konns gäi,  
es iss mol wärrer arig schäi!  
Gäbt meer noch e Glos voll Woi,  
sou schee kenne Geldautomate soi.

## Prost

Sou ehr Leit, des wors gewäse,  
eh paar Geschichte häwwe meer rausgeläse,  
die letscht worn im Ort unscheniert,  
zum Glick wor jo nix schlimmes bassiert  
nemmt nix for krumm unn bleibt debei,  
die Kerb leb hoch unn macht uns frei

veel Spass noch do, bei unsrer Kerwe,  
die Kerwe, die soll ewisch läwe!  
ich häb geredd, zum zweide Mal,  
der Wippi aus em Rousetal.

Wem iss die Kerwe!!!!

Lied:

Im Tale der Rosen